

'n Leier in Rekeningkundige Onderrig

# Rekeningkunde@UJ



# REKENINGKUNDE 100

## FINALE ASSESSERINGSGELEENTHEID

10 November 2014

Punte: 150

Tyd: 180 Minute

### Eksamineerders

Me Daniella Goncalves

Mnr Tendani Mutshutshu

Mnr Jelvin Griffioen

### Moderators

Me Marelize Malan

Professor Nerine Stegmann

### Instruksies:

- Bevestig asb. dat u vraestel uit 10 bladsye bestaan (insluitende voorblad).
- Lees vrae behoorlik deur en bestuur u tyd deeglik.
- Moenie in potlood skryf of tip-ex gebruik nie.
- Handig ongebruikte antwoordblaie saam met u voltooide antwoordstel in.
- Hierdie vraestel moet nie saam met u vraestel ingehandig word nie.
- Beantwoord u vrae asseblief op die volgende kleur antwoordboeke:

V1 = Blou

V2 = Groen

V3 = Rooi

V4 = Geel

**VRAAG 1 (30 PUNTE)**

Hierdie vraag bestaan uit 3 onafhanklike gedeeltes.

**GEDEELTE A (12 PUNTE)**

Honeymoon Beperk bedryf 'n oord en spa in die Magaliesberge. Die maatskappy se finansiële verslagdoeningstydperk eindig op 30 September 2014. Die finansiële direkteur het u hulp versoek met die openbaarmaking van die volgende aangeleenthede:

- Op 5 Julie 2014 het 'n pasgetroude paartjie in die oord se swembad verdrink nadat hulle wederregtelik die geslote swembad gedurende die nag binnegedring het terwyl geen lewensredders aan diens was nie. Die familie van die paartjie het 'n regsgeding teen die maatskappy ingestel, ingevolge waarvan hulle R2 miljoen eis vir skadevergoeding te wyte aan nalatigheid van die maatskappy. Honeymoon Beperk het regslui aangestel om die eis teen te staan. 'n Onafhanklike regskundige het verklaar dat die kans op sukses van die eis minder is as 50% maar ook dat, indien die maatskappy skuldig bevind sou word, wat wel moontlik is, die skadevergoeding toegestaan deur die hof R2 miljoen kan beloop.
- Op 29 Julie 2014 het die finansiële bestuurder 'n personeellid afgedank wat laat opgedaag het vir werk. Die personeellid het toe 'n eis vir onbillike ontslag teen die maatskappy ingestel. Die saak is op 25 September 2014 in die Rustenburg streekhof aangehoor en die hof het ten gunste van die voormalige personeellid beslis, maar het uitspraak insake die vergoedingsbedrag tot 3 Desember 2014 voorbehou. Die maatskappy het ingestem om die skadevergoeding te betaal maar sal wag op die uitkoms van die uitspraak op 3 Desember 2014 om dan die nodige betaling te maak. Die maatskappy het verskeie regskundiges geraadpleeg vir 'n mening aangaande die moontlike bedrag betaalbaar, maar die regskundiges kon nie ooreenstem oor die bedrag betaalbaar nie en die bedrag van die aanspreeklikheid kan derhalwe nie soos op 30 September 2014 bepaal word nie.
- Honeymoon Beperk verkoop verskeie skoonheidsbehandelingsmiddels wat by die oord vervaardig word. Die produkte word met 'n geld-terug-waarborg verkoop ingevolge waarvan klante toegelaat word om produkte terug te besorg aan Honeymoon Beperk vir 'n volle terugbetaling binne een maand nadat die transaksie plaasgevind het. Die maatskappy se ervaring is dat 10% van totale verkope terugbesorg word vir 'n terugbetaling, en maak dienooreenkomsdig 'n voorsiening aan die einde van elke verslagdoeningstydperk.

**Totale verkope van skoonheidsbehandelingsmiddels per maand**

	R
September 2013	320 000
September 2014	250 000

In Oktober 2013 het die terugbetaling m.b.t September 2013-verkope, R28 500 beloop.

**Verlang:**

Gegrond op die inligting hierbo verskaf, toon die volgende aantekeninge by die finansiële state van Honeymoon Beperk vir die verslagdoeningstydperk geëindig 30 September 2014:

- Voorwaardelike aanspreeklikhede
- Voorsienings (12)

**Let wel:**      - Ignoreer BTW.  
                  - Vergelykende syfers word nie verlang nie.

**GEDEELTE B****(14 PUNTE)**

Siyabonga Beperk se direksie sal op 30 April 2014 vergader om die finansiële state vir die verslagdoeningstydperk geëindig 31 Maart 2014 goed te keur. Die maatskappy verlang u hulp met die volgende gebeure wat in April 2014 plaasgevind het:

**Geval 1**

Jozini Beperk, 'n debiteur wat Siyabonga Beperk op 31 Maart 2014 R5 000 skuld, is op 5 April 2014 insolvent verklaar. Siyabonga Beperk het geen afskrywings of toelaes vir hierdie skuld gemaak nie. Die finansiële direkteur van Jozini Beperk het Siyabonga Beperk op 6 April 2014 geskakel en die maatskappy ingelig dat hulle reeds vir 'n lang tyd finansiële probleme ondervind het en dat hulle nie in staat sal wees om enige van die uitstaande skuld te vereffen nie.

**Geval 2**

Sommige voorraad wat op 31 Maart 2014 voorhande is en teen kosprys ingesluit is in die voorraadsyfer, is in April 2014 teen R100 000 onder die kosprys verkoop.

**Geval 3**

Op 20 Januarie 2014 is 'n eis teen Siyabonga Beperk ingestel vir mediese onkoste deur 'n klant wat in die winkel gegly en gevallen het. Die direkteure was van mening dat die saak nie sal slaag nie en het geen voorsiening op 31 Maart 2014 vir die eis gemaak nie. Die hof het egter op 20 April 2014 ten gunste van die klant beslis en beveel dat Siyabonga Beperk R56 000 as skadevergoeding moet betaal.

**Geval 4**

Op 10 April 2014 het 'n aardbewing skade van duisende Rande aan Siyabonga Beperk se stoorkamer veroorsaak. Na verdere ondersoek is vasgestel dat Siyabonga Beperk nie verseker was vir hierdie skade nie en dat dit 'n ernstige negatiewe uitwerking sal hê op die maatskappy se bedrywigheid oor die volgende twee jaar.

**Verlang:**

- (a) Met verwysing na die konsep "gebeure na die verslagdoeningsdatum", verskaf 'n kort definisie van aansuiweringsgebeurtenisse en nie-aansuiweringsgebeurtenisse. (2)
- (b) Ten opsigte van elk van bogenoemde gevalle:
  - i) Toon of dit 'n aansuiweringsgebeurtenis of nie-aansuiweringsgebeurtenis is; en (4)
  - ii) Motiveer u antwoord kortliks (in een sin). (4)
- (c) Verduidelik en motiveer wat die rekeningkundige hanterings- en/of openbaarmakingsvereistes is vir geval 4 vir die verslagdoeningstydperk geëindig 31 Maart 2014. (4)

**GEDEELTE C****(4 PUNTE)**

Manacor Bpk het onlangs 'n gebou vir R2 miljoen gekoop. Die maatskappy gaan die gebou vir sy eie administratiewe doeleindes gebruik. Die besturende direkteur van Manacor Bpk het besluit dat die nuwe gebou as Beleggingseiendom geklassifiseer moet word aangesien, soos hy dit verstaan, waardevermindering dan nie op die bate afgeskryf sal word nie.

**Verlang:**

Stel 'n memorandum op aan die besturende direkteur waarin u, met opgaaf van redes, verduidelik of die gebou as Beleggingseiendom geklassifiseer kan word ooreenkomsdig IAS 40.

**VRAAG 2****(30 PUNTE)**

Azilana Transport Entiteit verskaf vervoerdienste aan gaste op 'n gewilde wildreservaat. Die entiteit se huidige verslagdoeningstydperk eindig op 30 Junie 2014. Azilana en al sy verskaffers is geregistreerde BTW-ondernehemings. Die BTW-koers is 14%.

**Voertuie**

Azilana besit 5 wildbesigtigingsvoertuie, aangekoop op 1 Januarie 2012 teen 'n kosprys van R300 000 elk (BTW uitgesluit), om die klante rondom die lodge en die wildplaas te vervoer. Wildbesigtigingsvoertuie word volgens die BTW-Wet nie as passasiersvoertuie geklassifiseer nie. Die voertuie word teen 20% per jaar op die verminderende saldo-metode afgeskryf en het 'n reswaarde van R45 000 per voertuig (BTW uitgesluit).

Op 31 Maart 2014 is een van die voertuie deur 'n olifant gestamp. Gelukkig is geen passasiers gedurende hierdie voorval beseer nie maar die voertuig is onherstelbaar beskadig. Op 10 April 2014 het die versekeringsmaatskappy 'n vergoedingsbedrag van R171 000 ten opsigte van hierdie voorval betaal.

'n Nuwe voertuig is op 1 Mei 2014 aangekoop om die beskadigde voertuig te vervang. Die faktuurprys van die nuwe voertuig het R342 000 beloop en het uit die volgende bestaan:

	R
Kosprys	250 000
Registrasie en padwaardigheid	10 000
5-Jaar onderhoudsplan	40 000
Prys, BTW uitgesluit	300 000
BTW teen 14% (Ooreenkomstig die BTW-Wet kan 'n BTW-inset geëis word)	42 000
Prys, BTW ingesluit teen 14%	342 000

**Helikopter**

Azilana besit ook 'n helikopter wat op 1 Januarie 2012 teen 'n prys van R800 000 (BTW uitgesluit) aangekoop is. Die helikopter word ooreenkomstig die aantal vliegure wat die helikopter oor sy nuttige lewensduur kan aflê, naamlik 1 000 000 totale vliegure, afgeskryf, en het geen reswaarde nie.

Totale vliegure reeds gevlieg:

	Ure
1 Januarie 2012 – 30 Junie 2012	25 000
1 Julie 2012 – 30 Junie 2013	125 000
1 Julie 2013 – 30 Junie 2014	140 000

Op 30 Junie 2014 word die volgende bedrae met betrekking tot die helikopter verskaf:

	R
Billike waarde min koste om te verkoop	480 000
Gebruikswaarde	515 000

**Vliegtuig**

Azilana besit 'n klein vliegtuig wat vir wildbesigtiging gebruik word. Die vliegtuig is op 1 Julie 2012 teen 'n prys van R1 400 000 (BTW uitgesluit) aangekoop. Die vliegtuig bestaan uit twee komponente, naamlik die bakwerk (teen 'n kosprys van R1 200 000) en die enjin (teen 'n kosprys van R200 000). Die bakwerk van die vliegtuig word oor 10 jaar op die reguitlynmetode afgeskryf (met geen reswaarde) terwyl die enjin afgeskryf word oor 5 jaar ooreenkomstig die reguitlynmetode (met 'n reswaarde van R40 000, BTW uitgesluit). Op 30 Junie 2014 is daar beraam dat die enjin van die vliegtuig 'n oorblywende nuttige lewensduur van 7 jaar het met 'n onveranderde reswaarde en dat dit steeds ooreenkomstig die reguitlynmetode afgeskryf sou word. Die oorblywende nuttige lewensduur van die bakwerk het onveranderd gebly.

**Verlang:**

- a) Verskaf al die joernalinskrywings van toepassing op die beskadigde voertuig en die uitbetaling van die versekeringsseis vir die voertuig vir die verslagdoeningsperiode geëindig 30 June 2014. (10)
- b) Verskaf die aantekening met betrekking tot Eiendom, aanleg en toerusting in die finansiële state van Azilana Transport Entiteit vir die verslagdoeningstydperk geëindig 30 Junie 2014 (totaal-kolom nie verlang nie). (20)

**Let wel:**

- Aantekeninge met betrekking tot rekeningkundige beleid word nie verlang nie.
- Vergelykende syfers word nie verlang nie.
- Berekeninge moet duidelik getoon word.
- Waar van toepassing, moet bedrae tot die naaste Rand afgerond word.

**VRAAG 3 (30 PUNTE)**

Grupo Desperado Entiteit is 'n groothandelaar in alle soorte sokkertoerusting en kleredrag. Grupo Desperado sowel as sy verskaffers is geregistreerde BTW-ondernemings ooreenkomstig die BTW-Wet. Grupo Desperado se huidige verslagdoeningsdatum is 31 Desember 2013 en die eienaar sal waarskynlik die 2013 finansiële state op 20 Februarie 2014 goedkeur.

Grupo Desperado het onlangs 'n nuwe boekhouer aangestel wat vaardig is maar nog nie vertroud is met Grupo Desperado se besigheid nie, en derhalwe probleme ondervind het met die voltooiing van Grupo Desperado se finansiële state. Grupo Desperado gebruik die deurlopende voorraadstelsel om sy voorraadtransaksies te boek te stel.

Die volgende transaksies en gebeure moet nog in Grupo Desperado se rekords erken word en sluit, waar van toepassing, BTW in teen 14%:

1. Grupo Desperado se BTW-tydperk is 'n kalendermaand. Die BTW-opgawe vir November 2013 gee die volgende bedrae weer:

R
BTW-uitset
231 500
BTW-inset
187 000
Bedrag verskuldig aan die SAID
<hr/> 44 500

Die bedrag verskuldig aan die SAID ten opsigte van die November 2013 BTW-opgawe is op 24 Desember 2013 deur middel van 'n EFO aan die SAID betaal.

2. Na voltooiing van die Desember krediteurerekonsiliasie ten opsigte van Supplier Union, het Grupo Desperado se boekhouer die volgende verskil opgemerk:

'n Kredietbedrag bestaan in Supplier Union se rekening in Grupo Desperado se rekords, ten opsigte van voorraad aangekoop deur Grupo Desperado op 28 Desember 2013, wat R13 680 beloop. Die ooreenstemmende debiet-bedrag wat op Supplier Union se staat verskyn, is slegs R12 996. Hierdie verskil het ontstaan omdat Grupo Desperado se boekhouer onbewus was dat Grupo Desperado altyd die 5% vereffeningenkorting benut wat Supplier Union op hierdie transaksies toestaan.

3. Op 1 Junie 2010 het Grupo Desperado 'n bedryfshuurooreenkoms aangegaan om 'n gebou te huur wat as 'n pakhuis gebruik sou word. Die huurtermyn is 9 jaar. Die huurpaaiemente sal soos volg betaal word:

- R12 000 per maand vir die eerste 3 jaar van die huurooreenkoms;
- R19 000 per maand vir die volgende 3 jaar van die huurooreenkoms; en
- R20 000 per maand vir die oorblywende 3 jaar van die huurooreenkoms.

Grupo Desperado het die korrekte bedrag van R193 000 in huurpaaiemente betaal vir die verslagdoeningstydperk en het die volle bedrag gedebiteer teen bedryfshuuruitgawes vir 2013. Die nuwe boekhouer het nie geweet hoe om hierdie transaksie te hanteer nie en geen ander inskrywing is derhalwe in hierdie opsig gemaak nie. BTW is nie op hierdie huurooreenkoms van toepassing nie.

4. Op 1 Januarie 2013 het Grupo Desperado 'n masjien met 'n kosprys van R100 000 deur middel van 'n huurooreenkoms bekom. Hierdie masjien is spesiaal ontwerp om klante se voete te meet sodat 'n sokkerskoen perfek aan hulle voete gepas kan word. Die huurooreenkoms voldoen aan die vereistes van 'n bruikhuurooreenkoms. Eienaarskap van die masjien is op 1 Januarie 2013 aan Grupo Desperado oorgedra.

Die volgende terugbetalingskede is beskikbaar ten opsigte van die bruikhuurlening:

Datum	Paaiemnt	Totaal	Kapitaal	Rente @ 10% per jaar	Uitstaande kapitaalbedrag
01/01/2013					100 000
31/12/2013	Paaiemnt 1	31 547	21 547	10 000	78 453
31/12/2014	Paaiemnt 2	31 547	23 702	7 845	54 751
31/12/2015	Paaiemnt 3	31 547	26 072	5 475	28 679
31/12/2016	Paaiemnt 4	31 547	28 679	2 868	0
		<b>126 188</b>	<b>100 000</b>	<b>26 188</b>	

Grupo Desperado skryf masjienerie af oor hulle nuttige lewensduur deur middel van die reguitlynmetode. Die verwagte nuttige lewensduur van hierdie masjien is 5 jaar.

Aangesien die boekhouer slegs kort nadat hierdie transaksie aangegaan is begin werk het, is die transaksie glad nie teboekgestel nie. Ignoreer BTW.

5. Op 31 Desember 2013 het 'n finale voorraadopname die saldo van voorraad voorhande aangedui as R540 000 terwyl die voorraadreks 'n bedrag van R545 000 op dieselfde datum aangedui het.
6. Die volgende items op die staat van die tjekekening vir Desember 2013, wat ontvang is op 2 Januarie 2014, moet nog in Grupo Desperado se rekords erken word:

#### Coach Dias Bank

#### Tjekekeningstaat vir Grupo Desperado Entiteit

Datum	Beskrywing van transaksie	Debiet	Krediet
28/12	Direkte krediet Debiteur Sporting		5 700
31/12	Kredietrente		560
31/12	Bankkoste	490	

#### Verlang:

Erken die uitstaande transaksies in die rekeningkundige rekords van Grupo Desperado Entiteit vir die verslagdoeningstydperk geëindig 31 Desember 2013 deur die betrokke joernaalkrywings te verskaf. (30)

#### Let wel:

- Joernaalkrywings en die uitwerking van die transaksies op die rekeningkundige vergelyking word **nie verlang nie**.
- Berekeninge moet duidelik getoon word en moet, waar van toepassing, afgerond word tot die naaste Rand.

**VRAAG 4****(60 PUNTE)**

Op 31 Desember 2013 verskyn die volgende saldo's in die finansiële rekords van VE (Edms) Bpk, die verslagdoeningsdatum van die maatskappy:

	Bykomende inligting	Dt R	Kt R
Gewone aandelekapitaal (1 Januarie 2013)	1		25 000 000
Voorkeuraandelekapitaal (1 Januarie 2013)	1		1 080 000
Bate onder konstruksie - Gebou	2	95 000 000	
Geboulening	2		115 000 000
Aanleg	3	25 000 000	
Voertuie		1 500 000	
Opgelope waardevermindering: Aanleg	3		10 000 000
Opgelope waardedaling: Aanleg	3		1 500 000
Opgelope waardevermindering: Voertuie			750 000
Kantoorblokgebou	4	12 500 000	
Belegging in filiale	5		
NM (Edms) Bpk		6 000 000	
PM (Edms) Bpk		7 500 000	
KO (Edms) Bpk		2 450 000	
Belegging in MK Bpk – genoteerde aandele	6	3 900 000	
Termyndeposito		1 750 000	
Handelsmerke (1 Januarie 2013)	7	1 329 500	
Handelsvoorraad		4 150 000	
Debiteure		1 540 000	
Bankoortrekking			1 478 000
Verkope			54 000 000
Koste van verkope		12 450 000	
Rente op spesifieke lening vir konstruksie	2	14 628 000	
Rente ontvang op belegging van onbenutte gedeelte van spesifieke geboulening	2		2 500 000
Ander inkomste & uitgawes		15 180 500	
Inkomstebelastinguitgawe		6 430 000	
		211 308 000	211 308 000

**Bykomende inligting****1. Aandelekapitaal**

- VE (Edms) Bpk het 'n gemagtigde aandelekapitaal van 20 000 000 gewone aandele en 2 000 000 9% voorkeuraandele.
- Op 1 Januarie 2013 het die uitgereikte aandelekapitaal uit 10 000 000 gewone aandele van R2.50 elk en 900 000 9% voorkeuraandele van R1.20 elk bestaan.
- Op 31 Maart 2013 het die direkteure 'n verdere 1 000 000 gewone aandele uitgereik teen 75c elk asook 200 000 9% voorkeuraandele teen R1.00 elk.

2. VE (Edms) Bpk het besluit om sy eie hoofkantoor in Sandton op te rig. In Junie 2012 het VE (Edms) Bpk 'n lening van R115 000 000 vir hierdie projek verkry met die volgende voorwaardes:

- Rente word op die lening gehef teen 12% per jaar en word half-jaarliks betaal. Onbenutte-/oorskotfondse word op die korttermyn belê.
- Die lening is terugbetaalbaar op 31 Desember 2016.
- Die gebou onder konstruksie dien as sekuriteit vir die geboulening.

Al die ander oprigtingskoste vir die gebou is korrek verantwoord.

3. Bykomend tot die bestaande aanleg het VE (Edms) Bpk 'n huurooreenkoms op 2 Januarie 2013 aangegaan om 'n tweede aanleg teen 'n kosprys van R15 500 000 te verkry. Die huurtermyn is 5 jaar, waarna eienaarskap van die nuwe aanleg na VE (Edms) Bpk sal oorgaan. 'n Deposito van R1 500 000 is op die aanleg betaal. Die oorblywende saldo op die koopprys sal in 5 gelyke jaarlike paaiemonte vereffen word teen 'n rentekoers van 11% per jaar. Die verwagte nuttige lewensduur van die aanleg is 8 jaar met geen reswaarde. Die aanleg dien as sekuriteit vir die huurooreenkoms. Geen inskrywings is nog teboekgestel ten opsigte van die aankoop van die aanleg nie.

4. VE (Edms) Bpk besit 'n kantoorblok langsaaan sy vervaardigingsfasiliteit in Edenvale. Die gebou is gekoop met die doel om inkomstestrome te diversifiseer en word gebruik om huurinkomste te verdien. Die eiendom word ooreenkomstig die billike waarde-model verantwoord. 'n Onafhanklike geswore waardeerder het bepaal dat die billike waarde van die gebou op 31 Desember 2013 R14 500 000 beloop.

#### 5. Belegging in filiale

- Die belegging in NM (Edms) Bpk verteenwoordig 'n 75% belang in die uitgereikte aandelekapitaal van 2 000 000 gewone aandele in NM (Edms) Bpk.
- Op 1 September 2013 het VE (Edms) Bpk al 1 000 000 aandele in PM (Edms) Bpk, 'n belangrike verspreider van VE (Edms) Bpk se produkte, verkry vir R7 500 000. Transaksiekoste en regskoste van R50 000 en R75 000 onderskeidelik, is aangegaan met die verkryging. Die Transaksiekoste en regskoste is in die lyn-item "ander inkomstes en uitgawes" in die lys van saldo's op 31 Desember 2013 ingesluit.
- Die aandele in KO (Edms) Bpk is teen R2 000 000 verkoop aangesien bestuur van mening was dat daar geen strategiese rede was om die belegging te hou nie. Die verkoop moet nog erken word.

6. Die belegging van 250 000 gewone aandele in MK Bpk is op 30 Junie 2011 verkry. MK Bpk is op die JSE genoteer met 20 000 000 uitgereikte gewone aandele. Die volgende JSE-genoteerde aandelepryse van MK Bpk se aandele word aan u voorgehou:

Datum	Billike waarde per aandeel
31/12/2011	R10.10
31/12/2012	R15.60
31/12/2013	R14.80

## 7. Handelsmerke behels die volgende saldo's op 1 Januarie 2013:

	Handelsmerke		
	CAT	JAG	Totaal
	R	R	R
Kosprys	750 000	800 000	1 550 000
Opgelope waardevermindering	(112 500)	(100 000)	(212 500)
Opgelope waardedaling	(8 000)		(8 000)
	629 500	700 000	1 329 500

- VE (Edms) Bpk het die CAT handelsmerk op 30 Junie 2011 verkry. Die koopooreenkoms bepaal dat die tydperk tot 10 jaar beperk sal word. Op 31 Desember 2013 is daar betroubaar bepaal dat die verhaalbare bedrag van die handelsmerk R500 000 beloop.
- Die JAG handelsmerk is op 1 Januarie 2012 aangekoop en daar is op daardie datum bepaal dat die nuttige lewensduur van die bate beperk sal word tot die 8 jaar van die ooreenkoms. Op 30 Desember 2013 het die direkteure van VE (Edms) Bpk die verlenging van die gebruik van die handelsmerk suksesvol vir 'n bykomende 3 jaar by die oorspronklike ooreenkoms onderhandel.
- Die TAF handelsmerk is op 31 Oktober 2013 teen R900 000 aangekoop met 'n beraamde nuttige lewensduur van 6 jaar, en is nog nie teboekgestel nie.

Handelsmerke word geamortiseer op die reguitlynmetode oor die nuttige lewensduur daarvan. Geen reswaardes word verreken nie.

Geen transaksies is nog met betrekking tot handelsmerke in 2013 teboekgestel nie.

- 8. Op 31 Desember 2013 het die direkteure 'n dividend van 50 sent per gewone aandeel verklaar. Geen inskrywings is nog vir hierdie transaksie erken nie.

**Verlang:**

Na verrekening van die bykomende inligting:

- a) Openbaar die aantekening vir die *Ontasbare bates* by die staat van finansiële posisie van VE (Edms) Bpk op 31 Desember 2013 (totaal-kolom nie verlang nie); (15)
- b) Toon slegs die *Nie-bedryfsbates*-afdeling van die staat van finansiële posisie van VE (Edms) Bpk op 31 Desember 2013 (d.w.s. aantekeninge word nie verlang nie); (17)
- c) Openbaar slegs die *Langtermynlenings*-aantekening by die staat van finansiële posisie van VE (Edms) Bpk op 31 Desember 2013; en (19)
- d) Bereken die *verdienste per aandeel* van VE (Edms) Bpk vir die verslagdoeningstydperk geëindig 31 Desember 2013 as die Wins voor belasting **R23 930 000** bedra. Aanvaar dat alle regstellings alreeds korrek verreken is (d.w.s. begin u VPA-berekening met hierdie korrekte syfer verskaf). (9)

**Let wel:**

- Vergelykende syfers word nie verlang nie.
- Ignoreer BTW.
- Toon alle berekenings duidelik.
- Waar van toepassing, rond alle bedrae af tot die naaste Rand.